

四庫全書

史部

欽定四庫全書

史部

徐霞客遊記卷三下

詳校官太常寺少卿

臣陳桂林

編修臣程嘉謨覆勘

總校官庶吉士

朱鈐

校對官主簿

周鏞

謄錄監生

黃裳

欽定四庫全書

徐霞客遊記卷三上

明 徐宏祖 撰

西南遊日記三

廣西

丁丑閏四月初八日分顧僕舟抵桂林予同靜聞從湘江南岸登涯為山角驛即黃沙也西南行大松夾道五里黃沙鋪又二十里舍官道右入山西向大山行四里止山下牛頭岡

初九日西五里至礮岩普順寺寺前門東向如橋出水
約三十丈后門北向入水約十五丈泉自山后破石窟
三級下故曰礮西二里小石山兀立路旁又三里張家
村村后大山曰迴龍岩南五里上大衝衝西半里飯福
壽巷西北上柳山三里宿獅子岩南清泉巷

初十日南下二里至湘山寺寺在全州西門外半里登
殿觀無量壽佛塔塔后有飛來石出寺由寺西泝羅江
一里上捲雲閣閣西為盤石半嵌江中絕壁有蓮花一

辦凹入壁間白辦黑崖又西一洞臨江泉由洞東裂石
出曰玉龍泉復有一石峰高聳共十五里度石蜆岡差
南為龍洞小山獨立江上門西向出洞而西抵橋度橋
度水東自龍水出口山聳秀夾立

十一日度橋西北行十里北入峽為山川口又十三里
抵白竹江望西北鉤挂山甚峭特聞其上金寶頂甚奇
遂自白竹橋朔江西北五里進峽口兩山壁立夾溪
沿溪東北崖上行緣崖高下屈曲十里出峽為南峒聞

南洞北五里峒盡可由四川嶺達寶頂但路已沒遂舍
北道西渡溪上嶺嶺左腋有瀑布又十里至打狗凹宿
興隆菴菴北高嶺即金寶頂也

十二日由菴西上沿崖北轉三下上又三度坳曲共三
里踰土地坳西望新寧江已在山麓下山五里大竹坪
坪北踰嶺共三里至大鼻山

十三日從大鼻村後夾澗上一里飛瀑懸崖宛轉下修
竹迴岩掩映即西板嶺上約行一里至南來大道乃南

從大源上此者又四里至角菴基伏身蛇行菴后叢竹
中四里乃從右崖叢中上又二里行觀音竹叢中竹大
如管多竹實如蓮肉大採笋置路隅識來徑竹中上二
里至寶頂殿基日甫中四山俱出南峰近為鈎挂山石
崖峭立東北向若削再南即打狗嶺再南為大帽再南
為南寶頂頂最高與北相頡頏而基后絕頂更倍之復
從竹叢中東北上一里至頂觀音竹更大笋腴美然叢
密無由四望登樹踐枝終不暢眺忽竹浪中出大石如

臺梯躋其上羣山歷可縷數仍下山宿大鼻村

十四日隨溪西下四里為大源則大鼻西峽水與村後東峽水會橋於上曰潮橋橋西為大源村余往南頂則從橋東隨澗南行里許度木橋澗忽東折入山路南出山隘澗復墜路東破峽出連搗三潭上方瀑長如布中凹瀑轉傾下圓整瀑勻成簾下二潭俱有圓石中立承水水墮潭作勢潑迴尤異又三里度橋為桐初有水南自打狗嶺來會亦橋其上二水合而西南則觀音橋跨

之大道從觀音橋西踰嶺出予從橋下隨溪南一里水
從西峽出路踰一嶺下墜深壑中四里至陳墓源瀑自
東南山峽中騰躍出與東嶺溪合亦橋跨其會處大道
與水俱南予度橋東躋嶺即湧瀑南嶺也二里平行嶺
脊北望北寶頂巋然峽中水近自打狗南崖直逼其下南
望新寧江流遠從巾子嶺橫界南寶頂之西其西南有
峰尖突正當陳墓水口已而路漸出其下二里南下嶺
行凹中二里又踰小嶺里許至蘇家大坪坪側大瀑破

山西向出勢甚雄下為大溪西北合陳墓源出口下午
東南上一嶺誤東往大帽嶺道乃西南轉六里出南寶
頂道桃子坪問上梁宿處四里而是踰嶺東至新開田
所有路南下覆草中復誤出其東歷險陂三里不辨所
向已忽得一龕地名挂幡去上梁五里矣其處五里至
快樂菴又十五里乃至南頂以暮雨遂歇龕

十五日雨不止滯龕中

閱

十七日從定心橋下過脊處覓蓮瓣隙痕削崖密附旁

元餘徑乃從脊東隔峽望之痕雖呀然然上垂下削非
可托廬架道處也乃上定心石過聖水涯再由捨身崖
登飛錫絕頂返白雲菴

十八日由東路下山一里餘路旁峭石分列石級出其
間為天門門外聳石立路右上大書白雲洞天從此歷
磴下危峭較勝西路四里經顯龍菴菴北向又東下南
望隔山飛瀑自那拏山南腋下先從寶頂即窺見至此
始睹崇隆若九天也又東下五里北渡一小溪溪竹中

有寺寂然曰苦煉菴菴南向左右各一溪自後來繞而
右溪較大橋橫其上水從西南山腋壁下菴前東南度
橋南上嶺其地竹甚大路始分東西歧從西下始見那
义瀑北挂層崖苦煉溪亦透空懸壑與那义大小高下
勢相頡頏而苦煉近在對山路沿之同下朗朗見其搥
壑勢其下山環成城瀑垂其中出西壁與那义東大溪
合而東南去又見西峽中一瀑透山下連瀉九層雖練
細然甚危長路乃東轉下共三里又一溪自西北來隨

而渡之始僅涓微漸下漸大遂成轟雷湧雪觀路循溪
北東二里為大坪右渡溪入一村家村西上流為蓮花
菴竹色叢鬱遂西南渡郡又大溪溪東北出白沙江又
西上嶺十三里抵望江踰嶺溯溪又十里為桐原山下
五里隨小車江南下又四里桐原大溪自西來與江合
而南去度小車江口橋從水東上山隨東江南路行峽
江山上極險峻一小石山北面平剖江遶其南路遶其
北東北又有小溪破峽成瀑凡東南四里始下至江涯

稍上有溪自東北來入其北峰曰不住巔

十九日東南上巔隨江東四里下涉跳石江又上山三里出兩山峽口壩堰水甚巨曰上官壩壩外一望平疇直南抵裡山隈出峽水東南入湘路隨峽右西南下一里抵白塘村後石山特立曰金鐘山下俱青石峭削西南度溪橋過棄雞嶺共八里出咸水則官道山棗驛也度橋西南行長松合抱夾道蔽天極似永明道十里石脂鋪從小路東南折五里抵界首為全州興安界

二十日溯湘江西五里出塔兒鋪古松時斷續不及全州連雲接嶂也三十里至興安縣萬里橋橋下水遶北城西去兩岸磴石中流平而不廣即靈渠已為漓江矣湘漓分水處尚在東三里也由橋北溯靈渠北岸東行已復北折渡大溪則湘江本流也上流堰不通舟既渡又東有小溪疏流若帶舟道從之蓋堰湘分水西注為漓又東濬湘支以達舟楫稍下復與江身合矣支流上跨以接龍橋橋南水灣為觀音閣去城東二里又東南

五里則湘水南來直逼石崖下崖竄立南向曰獅子寨
循寨足溯溪東入東北七里踰羊牯嶺抵狀元峰下有
迴龍菴

二十一日菴東踰小山南一里至長冲東逼狀元峰麓
又里許至草菴則狀元峰南一峰片插曰小金峰峭削
似過之二峰各有路皆草翳直東上二里抵狀元翠微
間山削草合蛇路伏沉莽中漸東北轉三里直上踰嶺
凹麻川逶其下麻川東大山橫亘屬灌陽界乃老龍脊

也凹北峰下即入九龍殿之峽予從凹南直躋峰頂峰甚峭窄凡七起伏其南一里上狀元峰則亭亭獨立矣但北面九峰相連南走與小金尚隔二峰峭若中斷不能飛渡故道必由麓更上小金頂也頂北第三峰西北石臺如船首飛翼凌空坐峰頂久之下返迴龍菴

二十二日東行二里過九宮橋踰小嶺共二里至錦霄是為峽口麻川江自南來北出界首截江以渡江深沒股麻川至此破山出名七里峽下又破山出名五里峽



錦霄在其中為陸行口過江溯東峽之溪入三里登山脊至九龍廟南北東皆崇山逼夾南麓即所溯溪之北麓溪聲甚厲下山過觀音閣支流分環閣四面惟南面石堰僅通水東西北則舟上下俱繞之惜閣小不稱閣東度石橋循分支西岸溯流一里至分水塘塘以巨石橫絕中流南北連亘以斷江身祇以小穴洩餘波由塘南分湘入漓塘之北即濬湘為支以通湘舟於觀音閣前者也遂刺舟南渡分漓口入分水廟西二里抵興

安南門出城西三里抵三里橋橋跨靈渠上渠至此細
流成涓石底嶙峋時巨舫鱗次以箔阻水俟水稍厚則
去箔放舟

二十三日橋西有金鼎山山為老龍脊由此至興安南
轉海陽雖為史祿鑿山分滴水而橋下有石底水不滿
尺終不能損其大脊也上一里至頂頂大止丈許惟南
面羣巒紛叢嵐霧中若聚米若流火俯瞰其出沒甚近
下至三里橋西隨靈渠西南去已而渠漸直南路益西

路右山石叢立雨中迴眺共十里而已透金鼎所望亂山堆疊中穿根盤壑多迴曲無升降又三里為蘇一坪東有岐可達乳洞予先西趨嚴關共二里而出隘口東西兩石山駢峙路出其下若門中關旁裂穴如圭梯厓入其中不甚敞空合如蓮瓣雨坐憩焉返由蘇一坪東南行一里溯靈渠東北上一溪東自乳洞夾注為清水乃東渡靈渠四里過大岩堰度堰東石橋轉入山南小石山分岐立路口洞呀然南向遂西向隨溪入二里至

董田巨村洞即在其北一里日薄不及登乃趨東山入隱
山寺寺後有洞門南向高懸水由下出西合乳洞北流
水破西北山腹出大岩堰縛炬從寺右入洞扳石壁上
石巉削圯仄下墜淵壁若裂深覓暗中水石无可著足
乃出

二十四日西二里至乳岩下洞中洞上洞雨中返寺
二十五日東一里出山口支峰兀立處有菴草翳无人
從菴左先循其上崖崖危草沒扳隙入轉崖之東則兩

壁門裂內纔一線剖宛轉嵌漏上夾參天離合殆十層
起下夾直墜澗底俱凭臨千尺夾半兩崖復有痕受足
肩倚隅崖手扳石竅元墜隕懼直進五六丈夾始東轉
出由支峰坳脊北望觀音岩在對崖亦幽削可喜昨從
其前盤山轉惜未一至今不能更北也下山東南十七
里至開洲為湘西岸南十三里宿唐匯田東有大山巋
然出東界上者曰赤耳山

二十六日南溯湘六里為太平堡東西山至是開成巨

塢小石峰一帶駢立湘水東南十里飯廟角雙泉寺南
二里東南歧入山又二里渡橋湘水有橋自此始循左
山南四里一石峰特立水中曰海陽山有海龍菴在峰
南石崖半菴為臨桂屬抵菴日已西乃下山自東麓二
洞門繞北西入一洞龍母廟已圯即從流水中行轉南
水遂成滙深沒股菴下石崖壁立下臨深塘由塘南水
中行東轉登山海陽山俱崆峒注水水門二南平西出
甚急東旱門二下一二尺即水滙其中深者五六尺山

南水塘有細流東源季陵亦下此則此山尚在過脊北水俱北流惟為湘源也漓源尚在海陽西西嶺角

二十七日東望白面山南諸峭峰甚奇聞其上有讀書臺遂東北四里渡雙溪橋又東一里尖峰在白面西望之趨及登嶺北坳望山下水反自北南去北皆山岡亘絕无容流處由棘中循崖南轉捫隙歷塊上峰腰一洞南向內西裂龕窟吐納日月以為即讀書岩矣但平入三四丈漸隘其下路復翳塞頗疑之出洞望洞東削崖

萬丈挿霄臨淵上一石飛突无所承極似巨鼠下躍然
无可捫乃裂棘扳條登梯懸石直至巨鼠崖下仰望巨
鼠又有二小鼠下垂崖腰一線痕可著足下仍峭壁又
東有巨擘一雙作接引狀手背拇指分合都辨至其處
山腰痕絕不可前乃從舊路下至南麓詢耕者讀書岩
尚在嶺坳西當從嶺西下不當東上也乃由麓西溯澗
而北則前所望溪從洞中出讀書岩在澗上登之洞西
向高而不廣內垂柱檠蓋羅列異觀三丈後即北轉下

隘不可俯視出過下水洞水即從讀書岩下石穴湧出
水與口平第見急湍湧流不見洞門也由海陽菴東過
季陵循過脊西行二里為海陽堡堡前又分一支南下
山與西山夾為兩界水始淙淙南出隨水下一里則西
谷中裂水破峽出又羅姑山與西嶺夾而成流者皆為
滴水源矣越之西南七里循大澗嶺上行忽有水自東
南下搗成澗路随之直墜澗底南越橋水自橋下復搗
峽中路不能從乃踰嶺隕然直下共四里出山口又西

南二里抵澗上西有銀燭山尖削特聳東南則石崖正
阨水口也

二十八日西南十里望西北五峰高突頂平若臺可奪
五臺之名西五里直抵五峰南則亂峰尖疊什百為伍
橫變側移殆難更僕數其陽即為榕村東南三十里有
靈襟洞南二里有陽流宕云西五里過上橋橋下水東
北自叢尖山南至此又西南穿石山腋共三里過廖村
西北有山危峙為金山東叢角亭亭更覺層疊者龍山

潭也又五里西穿石山峽則諸峰分峙疊出離立獻奇
石峰下俱水滙不流深者尺許淺半之諸峰倒挿於中
似青蓮出水各欲獨上初兩大峰夾道后又夾以兩銳
峰道俱疊水中取徑峰隙令人賞无專接但石皆廉利
侔双戟不免雙足趼耳峰有稱者曰雷劈曰萬歲其間
逸名者甚多共二里始出水磴平疇十五里直抵兩山
峽中山南北成門北山東垂石峰分歧起如削歧峰尤
亭亭作搔首態崖半裂透明隙惟南眺光截一線少轉

步即失之南山又有石突綴其首人行於下者左右流
盼又西為浮橋滴水北自皇澤灣至是極汪洋桂林省
城東臨其上城之臨水者東北為東鎮門極南為浮橋
門皆東面臨江自北隅南至浮橋共五門浮橋貫江而
渡覓願僕不得宿城中逆旅

二十九日東出就日門從城下北行城上一山當面起
石脚下挿江中路忽穿山透跨下南北呀然殆天關關
津也西則因山為城城以內即疊綵東隅穿洞出正下

臨江潭盤山壁透腋入又為木龍洞洞亦自南穿北東
開窻隙屢引天光外瀕江有路行者或內自洞行或外
由江岸俱可北達出洞片石夾峙上屈曲架穹石色錯
青紅似非本山石質不知何處移架此洞北闢成崖綴
以飛廊前臨大江後倚懸壁憩眺勝莫踰此循城溯江
北一里過東鎮門又北過城東北隅為東江驛驛東向
當皇澤灣南下衝出驛北望皇澤灣二紅船泊山下疑
顧僕或在此舟趨問之則泊舟之山在松陰中乃虞山

也其下大殿為舜祠祠後即韶音洞東臨江曰薰風亭
沿江登山上薰風亭由亭西下謁舜殿從殿後入韶音
洞洞西向高二丈東透出約十丈洞東高崖蘄絕小水
匯其前幽潭嵌壁水自北塢南來石梁當洞駕其上曰
接龍橋坐橋上還眺洞門崖壁更盡崢嶸之勢從此上
躋宛轉石級間將至山頂一淨室窓牖西向戶榻洒然
室斗大而潔乃與靜聞解衣憑几指點西山甚適因急
欲覓頤僕下山南循故道入就日門門內南半里由伏

波山下出桂水門南一里經行春至浮橋門始遇之

五月初一日北抵靖江王府循王城北行登疊綠山山
踞省城東北隅山門當兩峯間亂石層疊錯立浪紋花
萼騰簇眩目上為佛殿殿後一洞屈曲穿山背門南向
高二丈深倍之北透小門忽轉而東闢洞前下瞰城東
江水直漱其足洞內石門轉透處風從前洞扇入寒吹
凌人土人稱為風洞石門北向當東轉之上仰見石板
平皮上透圓竇若樓閣再駕予與靜聞分道趨而會層

樓之上其處東復開隙垂乳列於西乃從圓竇中墜空
下出後洞北躋磴上南越洞頂遂登絕巘則越王壇也
是為桂山上皆石罅矗發一石峰前支起謂之四望山
西一石峰高與此峰並峰半有洞高懸望之呀然中空
亟下仍從風洞出寺由寺西坳中復登西峰峰半有洞
東向透峰腹而西徑十餘丈高十之四由其中望東西
洞然惜絕頂地少側未能徹矚全勝耳是名千越山洞
西墜壑下極險峻仍東下至寺有大道北透兩峰間抵

麓西行里許又一洞倚山北向遂拾級以登其下先有
一洞高可丈五寬廣盤曲多垂柱界竅分歧土人以為
馬廐散卧馬匹令人氣阻由西南躋級更上從洞門入
透隙而西外裂重門內駕層洞既下西行見峰頂洞門
西墜處危峽孤懸下有長垣環之仰眺不得端委則藩
府別圃也北轉至北門門在兩山聳峽中門外兩旁山
俱峭拔即為華景寶積衆勝云折而東南出桂水門抵
慶真觀北渡江入玩珠岩即伏波山東麓石壁下嵌重

江裂隙兩層上縱下橫縱者高盤入頂元級可階橫者
下卧波上下石浮敞為臺覆以欹石石柱下垂覆簷外
直抵下石不接者僅寸名伏波試劍石後壁紅白紋若
縷圓宕三暈恰當其首故曰玩珠雙紋後內復裂隙直
抵豎峽下垂柱之西石臺中圻橫石以渡更北穿旁竇
下臨淵碧无底南入山腹有光西轉北透前門是其奧
境矣但石色波光俱不若外岩玲瓏映徹也登涯由浮
橋返寓按圖志以索桂林諸可遊者

初二日東出浮橋門渡浮橋又東渡花橋循山北轉山
峙花橋東北七星岩即倚焉岩西向下有佛壽寺寺左
登山一亭翼然迎客曰摘星石崖橫騫其上僅可容足
然俯瞰城堞諸山甚暢亭左佛龕當岩之口入其內不
知其為岩也推龕後扉入歷級上約三丈忽轉而西北
豁然中開上穹下平多列笋懸柱爽朗通漏比上洞也
為七星岩從其岩歷級下又入下洞為栖霞洞洞雄拓
門亦西北向仰眺崇赫洞頂橫裂一隙鯉自隙中懸躍

下向首尾鱗鬣酷肖傍盤結幡蓋五色燦爛西北層臺
高疊懸梯而上曰老君臺由臺北向洞若兩界西行高
臺之上東循深壑之中由臺上入一門直北至幽暗處
垂石上穹无際下陷成潭湏洞峭裂忽變夷為險返下
臺仍至洞底導者攜松明前驅循臺東壑中行始見臺
壁攢雲錯綺脩諸幻化觀直北入一天門石楹垂立僅
度單人既入穹然高遠左橫列石欄下深黑杳不見底
云獺子潭即老君臺北下墜處至此高深易位又成一



金溪先生集卷之三
境內又進兩天門路漸東北轉崖石詭變多所仿類導
者行急于強留諦視顧此失彼然予所欲覩者正不在
種種規擬也又踰崖上東有潭淵黑如獺子宏廣更過
之名龍江下與獺子潭通又北行東轉過紅白龜鳳凰
戲水穿一門出忽見白光一圓內映沉碧遂東出後洞
水自洞北環流南入洞中想下為龍江者小石梁跨其
上宋相曾布帥桂時所為易名曾公岩蓋與栖霞一洞
潛通兩門各擅耳予佇立橋上見澗中有浣汲者予詢

水從西北來可溯入否其人謂水穴之上更西北可深入數里名勝較倍栖霞水穴則深淺莫揆惟寒辰肅月為可涉予即倩其人為導其人歸取松明予隨之出洞右得慶林觀期觀中炊以待遂同導者入仍過紅白氈始由岐北向則佳偉殊麗繁錫嘉稱最深入遇潭淵杳當橋澗上流導者阻進謂前炬數日鮮竟游屐抵此從无入者况當夏漲襄陵可嘗不測乎乃返計自栖霞達曾公岩徑約二里復自岩口出入盤旋三里洞之觀止

矣飯慶林觀望來時所見搔首峰即立其東從間道出
其下則峰下西開一竅圃者廬之北復有岩洞叢羅遍
曾公岩上下左右殆難數記也循七星南麓北向草莽
中連入三洞計省春當在北可踰嶺達遂北循嶺坳微
徑里半至山頂石骨峻嶒不容著足石隙少開處棘刺
沉翳愈窮扳躋然片石布奇峰辨分異遠望掩映愈披
愈出令人心目勞遷又里半踰頂下復得鑿石之級級
盡即省春岩岩三洞排列俱東北向最西者騫雲上飛

有倒石下垂如枯槎老龍西入南轉洞漸黑惜无居人
不能索炬入洞右旁通一竅以達中洞甚深難遠入洞
前垂石亦作槎勢又透一門以達東洞東洞垂石愈繁
洞亦旁裂中有清泉下注寒碧成潭由洞前循崖東行
洞上聳石如人立獸蹲東則危崖亘空仰望如劈其下
拖劍水澱之即癸水也源發堯山抵山北麓西出葛老
橋入滴水時予轉至山東隅仰見崖半裂層竅者三乃
披莽隙梯懸累上既達一竅西通中竅中竅卑伏首不

得伸從外橫度有同臺榭不由中輿竟達第三竅竅隙入
後有一龕窻闢其前中懸玉柱柱左又著一龕圓頂平
座前正與玉柱對予同靜聞分踞窻隙下臨危崖行道
者仰望无不徘徊忘返二村樵仰睇久之亦躋登謂中
竅之上尚有一洞甚宏欲為予扳險上求予乃下倚松
陰從二樵仰睇處反睇二樵在上懸枝索級終阻懸漢
莫能階升也仍西入省春出西洞西又得二洞門北向
再西者高五丈內稍下西轉雖漸昏黑勢崇宏愈甚以

无炬中阻左崖大書深刻五美章乃張南軒筆惜无知者洞莫定其名或以為會仙岩彈丸岩岩壁宋莆田陳黼題則渚岩洞也洞之西拖劍水自東北直逼崖下崖愈穹削挿霄凭淵勢竭雄峻石梁跨水西渡已為七星山西北隅名彈丸山云由其西南渡葛老橋東望崖巔有洞高穹上下都削峭南有一崖架廬亟東向登山山下一刹與壽佛寺七星觀南北鼎列南為七星觀東上即七星洞中為佛壽寺東上即棲霞洞北為此刹東上

即朝雲岩也仰板磴數百級入岩岩亦西向在栖霞北
洞口高懸內北轉尤穹危薇僧太虛駕閣洞口絕壁下
瞰江城遠揖西山獨有勝概遂停宿因問上岩道太虛
曰此岩高聳雖予近在岩右曾无級可登約洞之南壁
與此洞北底隔止丈許洞內可鑿空以通洞以外更无
懸杙縲級處也憑欄北眺洞為石揜反不能近矚惟洒
髮向西山歷數諸峰耳西山自北而南極北為虞山稍
南為東鎮門山再南為桂山之木龍風洞最南為伏波

山北城東一支也虞山之西極北為華景山稍南為馬留山再南為隱山最南為侯山廣福王山北城西一支也伏波隱山中為獨秀其南對踞水口者為漓山穿山皆漓江以西故曰西山焉

初三日追錄遊記於岩閣薄暮返寓

初四日北二里至靖江王懺壇入藩城北門門內池水一灣南遶獨秀北麓由池西南經獨秀西麓至靖藩精舍主僧為予言君欲登獨秀須先啓王期以十二日可

登乃出藩城西穿榕樹門門北向大樹正跨其頂巨本
虬根盤鬱閭闔昔為唐宋南門元時拓城於外門久塞
嘉靖乙卯大將軍周於德發壅閉而門之門之前匯水
為大池後即門頂巨石疊級分東西上亦有兩大榕南
向東西夾之上建關帝殿南面臨池甚為雄暢殿西下
即大將軍幕府益西循城南一里西出武勝門北溯西
江又一里達隱山山北倚馬留西接侯山四面有六洞
環列東為朝陽洞寺在其下洞口東向下層通水上層

北關一門就石刻老君像今稱老君洞山北麓下為北
牖洞東石池一方水溢麓下匯而不流外竇卑伏而
內甚宏深前有菴由菴後披隙入洞圓整危朗後復上盤
一龕左有一窓兩關石柱旁列不通水竇其北崖之上
為白雀洞在朝陽後洞西門北向入甚隘前有線隙橫
列上徹天光漸南漸下直通水又西為嘉蓮洞亦北向
與白雀並列洞分東西兩隙俱南向下墜洞內時開小
穴彼此相望數丈輒合內墜淵黑亦抵水又西過一石



隙西北有石平度錯愕中絕勝瓊臺乃南轉為夕陽洞
西向洞口飛石中門為兩門左一側壑匯水由水竇東
通於內右有曲穴北轉內甚萋暗下墜深潭蓋南北皆
與水會焉又南轉西南山麓為南華洞洞南向勢漸下
匯水當門可厲入深入則六洞同流五洞之底皆交連
中絡惟北牖側另闢一水竇初不由洞中通云聞昔唐
宋西江東潞榕樹門隱山匯巨浸中是名西湖其時諸
紀勝者俱云乘舟載酒入今則西江南下繁厥桑田元

浩蕩觀予初至朝陽寺月印上人導由殿後入東洞穿
老君側出山北西過白雀嘉蓮皆北隅洞也南過西隅
夕陽洞又南盡東轉過南華則南隅之洞也予欲從此
涉水入月印謂秋冬水涸虫蟄窮幽无所憚今漲甚深
處莫測蛇龍窟宅其中老僧不敢導請北游北牖乃東
過西湖神廟北轉過朝陽踰隱山東北隅其處石片分
列如張幙如裁雲如透月巧變紛綸潤以采澤不啻削
芙蓉綴蛺蝶也又西入北牖菴予與靜聞分踞北牖洞

西窓内外周覽久之出飯菴前松蔭下復抵南華遇一
田叟曰此水竇旁通雖深淺疑迷予獨熟過其內君欲
入明當炬導佐前驅余強之即入曰松明未辦乃以旦
朝期予遂南過武勝門及寧遠門渡橋而南西江走其
下東分兩支入漓余東南循西江南分派一里抵漓山
山之東即漓江也從山西麓轉其北則漓水自北江水
自西俱直搗山下山怒崖騰力扼其衝由磴上盤山腰
得雉岩寺寺後躋石峽躡青蘿閣昏黑下宿岩寺

初五日客序遷除遂成午節令顧僕入郭市蔬酒出坐
雉岩亭以蒲酒雄黃自酌節况復散酒青蘿閣時方禁
龍舟舟人各以小艇私櫂山下鼉鼓雷殷迴波陷日既
暮下山西入一洞洞在山足門西向高穹中平上鐫樂
盛洞三字出洞東循雉岩崖麓沿江東憩其東隅一石
上自山巔下挿江底中剜穴透虛深二丈高三丈若闢
門然江流自北匯其中涉其南透崖以上為千手大士
菴余濯足弄江抵暮上宿雉岩雉岩者統志以為即滿

山在城南三里陽水南支經其北漓水南下經其東東
有石門嵌江西有穹洞深入南有千手大士菴俱列其
足雉岩寺高懸山半北逆兩江頽浪飛檻綴崖倒影沉
碧寺西為雉山亭南為雉山洞洞外即飛崖斗發裂隙
迸峽直自巔下徹旁有懸龍矯變石色都異前大石平
湧為蓮臺臺右根與後峽相接處下透小穴西向臺隙
摩崖登臺則懸龍架峽正出其上昔有閣曰青蘿今移
置臺端登之不知其為臺也然勝概庸集不以閣掩是

山正對城南為城外第二重案山北一里曰象鼻山水
月洞南三里曰崖頭淨瓶山荷葉洞俱東逼漓江而是
山在中較高志遂以此為漓山范成大又以象鼻山為
漓山二山形頗相似但雉岩石門不若水月擴然巨觀
故遊者拾級趨此然以予權之瀕江午向三山不特此
二山相匹崖頭西北山脚石亦剝空嵌水跨成小門其
離立江水衝合中三山俱可名漓也

初六日南下山二里過南溪橋南溪之山高峙橋東南

溪來自西南直逼西麓繞山東北入溝去白龍洞在山
椒門高張西向臨溪下廣列崇殿仰望不知為洞由殿
左透級上得旋空如層樓內有龕自然為一洞絕勝處
從此北向東轉遂成昏黑先是買炬山僧僧謂洞內可
竟達劉仙岩不必更出及篝火入中頗寬敞多歧先極
其東隅上躋一隙余以為劉仙道也窮而无入又南下
一窪支竇旁予又以為劉仙道導僧謂此護珠岩道
嶮巖莫逾躑躅杳冥中不若出洞平行為便乃下山至

橋望白龍北復有洞盤空予渴赴劉仙岩遂自橋東循
山南東轉南面一崖層突彌聳將舍之忽山雨至奔憩
岩下躋隙坐飛石上雨簾外窺內映乳幙飄飄有餐霞
想久之雨止下岩轉其東至劉仙岩岩與白龍東西分
向有觀在岩下由觀右登級先穿一門西入即踰其上
復透門出得一岩東南向又左由透門之上再透而北
亦開一岩岩前懸石甚壯當洞門為屏若垂簾然至岩
周覽各竇詢與白龍潛通處竟不可得乃知白龍所通

即避雨岩下竇。導僧所云護珠岩是也。

初七日由觀左登穿雲岩。岩在上岩東南絕壁下。亦東南向。後與左右分穿三竇。而左竇旁透洞前。洞東為文昌祠。由其前東過仙人足蹟。蹟北更上。即為仙蹟岩。岩在穿雲東北。上岩正東隅。洞口亦東南向外。甚危亮。內乳柱倒垂。界為兩重。若堂皇之後。屏列窓櫺。分內外室。者洞後穿竇兩歧。俱不甚深。奇在玲瓏。殫致。返至觀南二里。出十里鋪。鋪在關雞西。郡往平樂大道。又東向歧。

路入一里北望穿山高懸隔江空濛雨色中再前望崖
頭北隅梳妝臺下飛石嵌江剗成門闕遠望較水月似
小與雉山石門形勢倫匹然急流湧其中蕩漾尤異共
一里東至崖頭廟崖頭在雉山南漓江西合陽江於雉
山又東會拖劍水及漓江支水於穿山奔流南下此山
當其衝山不甚高而屹立扼流有當熊勢北崖有臺曰
梳妝下即飛石懸嵌中剗成門處崖突波傾不能下瞰
但見迴瀾層波觸石奮出蛩然送聲至座坐久之返廟

中由其後入一洞門西南向穿門歷級下其後呀然通
望一石肺乘空色正綠為荷葉洞穿葉底透山東北即
通望口也滴江復潌其下由葉前南下東轉深昧中勢
穹然不及索炬入山東北隅石崖插江山稱淨瓶以此
須汎舟沿流觀之其上莫能窺也仍從大道十里鋪經白
龍洞北隨溪探前望白龍左洞則玄岩也岩東向洞門高
聳下峽由南腋東入上洞東登必由北與俱崇深幽邃
无炬不能遐歷洞前乳柱繽紛不減白龍上鐫玄岩字

甚古出洞入寧遠門返寓

初八日出安定門東轉北入支徑登劉岩山有菴在山麓後為劉岩洞洞西向東下淵黑由洞右躋危級上至明月洞洞高綴危崖半門亦西向東入呀然然昏窈莫辨出洞下崖半循崖少北復一洞西向門紛綸高懸僧伐木縱橫洞前无由上躋乃梯登以上一石當門樹屏由左透隙則宛轉玲瓏踰石脊東下隆然直透山腹關門東出外臨層崖內皆乳柱充隙徑竇迸裂北一徑高

穹下墜東轉亦有門東出暗不復下東西透豁然有脊
有門中界之不若穿山疊綵中隱南峰諸洞廓然平通
下望明皎內无餘輿也下山西過北門門西峰當面起
削山為城循山北麓轉至城西北隅下下盤層石上削
危城當即志所稱始安嶠也而北門在兩山夾中東西
峰各峭豎起因依為門鎖鑰甚壯少憩盤崖上旋入北
門南一里至桂嶺碑側西向瀕城復得一山為華景洞
洞東向前對大池後所倚山則亦因為西城者洞前岩

平朗上覆外敞後穿穴為門分為三南入者窪暗而邃
西透之穴昔穿城外因為門今已斃石塞北轉者上出
岩前遂西登城陴循南而升已從石萼叢錯中扳躋山
頂頂即寶積山志稱寶積與華景相連上多詭石怪木
然今又名卧龍山想以武侯祠易名耳下山二里抵寓
初九日出文昌門乃東南門也正對南溪山南過石梁
梁下即陽江北分派東轉一里抵石山南麓三教菴菴
後為古雲崖其山亦稱滴山粵人呼為象鼻山山東南

隅亦有洞南向循崖東北抵漓江盤山溯江從石崖
危嵌中得一洞北向曰南極洞出其前直至西北隅
為象鼻岩水月貫其下飛崖自頂騰跨北插中流東西
俱高剜成門陽江從城南西來流其中而合之漓上空
明如月下復內外滌波而挿江之崖下跨於水上屬於
山中垂外嶽正作捲鼻勢水洞之南崖半又闢陸洞其
崖亦自山頂東跨江畔中剏竅若長廊直透水洞上北
踞竅口下瞰水洞適有漁舟泊洞中崖石間令棹予遶

出洞外復穿入洞內水陸勝觀一時兼盡乃南行一里
渡漓江東岸又二里抵穿山下山西與鬬雞山對鬬雞
在劉仙岩南崖頭山北漓江西岸瀕江之山也東西夾
漓怒冠鼓距兩山當合名鬬雞特東山遶明如圓鏡故
更以穿山名之山之西又一峰危立初望竟為一山上
有豎石抵其下始見豎石下剖直抵山根亭亭夾立山
故以脆薄靈舉見奇土人名為荷葉山殊得之穿山北
麓嘉熙拖劍水直漱崖脚循山之西南與漓合予始至

其北隅不得渡望崖壁危懸洞門或明或暗紛紛錯列
即渡亦不得上乃隨溪南行隔水東眺則穿岩已轉不
睹空明山側成峰尖若豎指矣又以小舟東渡出穿山
南麓北面而登撥草尋磴一南向岩高倚山半疑即穿
岩乃其中乳柱中懸有曲折致東入漸窪黑水滙於中
知非穿岩乃出由其西上躋始得崇岩廓然平達山腹
徑山十餘丈高闊俱五六丈徹望澄明一空障塞板外
崖東轉又開北向一洞列並穿岩而後不中通其東尚

有三洞門下可望見至此則峭削絕徑而穿岩南口上
復疊一洞後亦不透然內多重幃殆為穿岩架閣也仍
東下滙水岩岩東復有南向洞內亦支竅西入隘黑无
竒遂出西渡荷葉山下北過訾家洲乃渡浮橋而返

初十日抵王城後門登懺壇訂主僧獨秀期更於十三
日

十一日出浮橋門過花橋門龍隱岩道為橋東之南崖
乃來時所過夾道兩山北即七星南即龍隱至是始得

其詳橋上南眺龍隱與月牙並列東崖第月牙稍北度橋循山其路易通龍隱稍南須從橋下涉江上其大道則自山北端拱石南踰嶺坳循隱真而西又從怡雲北轉始達予欲并眺端拱石人自橋東直走嶺下南上平瞻石人又南下得一大塘塘北循山西轉崖石俱盤削飛突里餘抵山西南隅峰益嵯峨疊異中空外聳上若鵲橋度虛板隙上登則怡雲亭廢址也由其上轉罅梯空穿石罅以躋石片片懸綴側為透峽平為架橋如上竿

轉塔无不曲折匠意下至怡雲右即龍隱岩洞門西向
高穹廣衍頂石平覆洞右近口復垂柱環為層龕重洞
接影深流此為最勝出岩仍從怡雲返花橋南沿西麓
隨流歷磴半里入月牙岩岩西向南即龍隱此則級石
成磴彼則斷壁斗崖路殊通塞岩上環西缺其口內不
甚深政以圓缺分明有同鈎月下照清泠亦幽境也出
由街北過七星食朝雲岩北度葛老橋覓屏風山或有
以黃金岩告者謂去城東北五里乃貿貿東北趨三里

遇負擔者指村北之山曰此即是至村問之仍不知也
及抵山東麓則峭崖列嶂平展危懸已轉北麓得洞門
如峽山頂高穹兩崖濶五丈高十餘丈初南向平入十
丈之內少東南轉忽明月上開自下望之殆蜃市重樓
矣從此高躋又十餘丈抵明穴之口采嫩松以拭崖壁
開辭別翳得程公岩三大字西有記文一則蓋鄱陽程
公崇寧帥桂時所開志載屏風岩一名程公至此乃爽
然自釋也遂西向歷級上登穴口其內岩頂之石層層

下垂極為雄俊將至出穴處地少平北輿有大石幢盤
疊至頂色碧形詭何設奇至此出穴而西山迴峽轉石
骨森豎下即盤峰成窩窩底一洞北向覓徑西南下抵
窩入洞洞不甚深即西踰窩出兩石峰駢枝並起一為
石工剝蝕殆盡一猶亭亭孤立從石峰東更西南三里
已出葛老橋西於是循朝雲七星西麓度花橋紛傳流
警薄永郡省城戒嚴門已鍵亟馳過浮橋門尚半啓得
返寓

十二日西出麗澤門門外巨塘滙水水自西北城角馬
留過脊處南抵振武門北入陽江石梁跨之曰涼水洞橋
橋南北塘中蓮花盛放坐蔭橋樹下殆不能去予欲覓
中隱山乃南至振武門西渡定西橋忽路右一山有洞
砢然即北趨其下前有古寺拭碑讀之西山也洞門南
向東又裂石自峰頂下跨成門乃捨洞趨之其門南北
豁然亦如雉山象鼻但彼急流中貫異於此之外遶
澄潭耳然外跨之石歌疊錯出尤露穎異遂先遶其東

抵山北北向亦有洞穿洞而南橫透山腹竟與南洞貫
徹中有夾門垂柱不似他洞徹望竟目也出南洞洞左
疊磴嵯峨循之北躋峰頂石皆峰嶸攢簇中旋為平凹
長若溝洫光滑特異下至南洞前始東入石門門乃片
石下攢中門高闢旁通衆竅故以小巧見奇望西峰石
亦聳立從寺後西歷其上歷級南下峰鐫中西循大道
三里聞木陵村有岩曰佛子遂從西北歧入二里石峰
在侯山東麓洞門高懸北抵岩下岩之東二洞南向最

東者敞而不深稍西則洞門側裂外垂列乳中橫一屏
屏後深峽下墜屏東西俱有門可下由峽中北入其竅
旁裂漸隘乃復出西上入大洞洞南下北上穹然高透
頗如程公以松枝拭右崖所題則宋呂愿中題中隱呂
公洞詩也後署云假守洛陽呂叔恭游中隱山元名洞
客有言此洞因君顯當以呂公名之因書五十六字鐫
於壁始知佛子岩即中隱山呂公洞也由是北躋後穴
內雲翼倒竄與洞俱上絕非逼隘觀穴口高朗大過程

公後穴也北出口石磴二道一東北下山麓予先從其
下者北向之麓皆崆峒幔覆外有倒石界而為門為窓
內蜿蜒旁通若行廊複道此下洞以幽奇勝既復上從
西北磴復得一洞洞北入南穹擴然平朗頗似穿岩南
一石聳立如臺上有石佛不知其所自來佛子岩所由
名矣前有巨石柱如屏中峙東西界為兩門西竅廣正
自下遠眺此竅直透北山東則偏隱无睹竅外循崖東
轉又開一門下臨中洞之上為關聖座仍由洞北東下

穿中洞南出西循山又開南向一洞與中洞並列由其
西扳磴上又有洞南向雨漬滑磴舍之下山東南半里
飯木陵民家民謂西南侯山下有銅錢岩可透出前山
北向趙家山亦有洞可深入又有陳搏岩頗奇予念諸
岩不能徧歷侯山為衆峰冠其岩不可交臂失遂由中
隱舊道西一里抵侯山廟廟後山麓漫衍蹈水披叢茫
不得洞但見有級上躋鼓興登絕頂山前行者高呼以
日暮不可登乃遙望大道南削峰南轉有洞東北穹立

望之趨南去里許抵其下洞高倚山半前有瀦水匯潭
潭上拾級扳荆遂入洞亂石堆洞門外外高內深歷石
級西南下直墜洞底水崖淵漠內望一石橫突出下有
仄崖嵌水裂隙受趾抵突石下畏仄崖峭滑乃出下山
轉出其東南山背復有門匯水卒莫定其為何洞也其
處西峰駢聳无侯山之高峭拔過之暮歸急始留為後
游二里南出大道路旁夾道之山上有竅東西透空與
佛子穿岩正等亦不及入問途人前所入北向洞何名

則架梯岩一名石鼓洞也紛傳城門已閉竭蹶東五里過木陵分歧處已夜又三里抵振武門將闔矣側身入始從容行街市中

十三日入靖藩城過獨秀西菴主僧入內宮禮懺登峰約復移之他日乃出就日門過木龍南洞由其下渡江還望木龍下層復有洞濱江穿麓潑流可愛上江東涯循流北半里入千佛閣前有大榕一株問所謂辰山者俱莫曉隨大路東北五里堯山在東屏風岩在南獨辰

山茫然莫辨忽北望一山去不一里碧然有洞洞口一石
當門赭色斑斕彪炳有異問負芻者曰老虎山也余謂
靜聞何不了此後覓辰山乃北一里抵山下望高先登
由洞口穿入其內天光自頂四射由下北透其腹再入
重門支峽後裂層度上層俱莫可度南向重門內扳崖
上躋逐踐層樓徘徊未下忽一人來候洞前下問之曰
洞名獅子一名黃鸝岩山前三洞下曰平地中曰道
士共此岩為三出洞見山頂石叢參錯循路上躋石片

片冰稜鐵色下巔石稜就夷棘道俱除前候者復趨上
引予左入道士岩岩亦南向在黃鸝東稍下洞前壁左
右各鐫詩拂讀詩序是山固即辰山也穿洞東側門出
東向下山東北一里飯所候者家主人王姓慶字字且
訂予宿此乃束炬肩梯導趨辰山北麓為青珠洞游洞
北向裂峽上並山頂內界兩層始南入十丈許扳崖上
稍西乃向北崖豎梯登北入峽中五丈餘透出橫峽峽
東西橫亘上高俱不見頂東行四五丈漸闢生光一大

石柱中懸繞出柱西峽又南北裂南入臨洞底北出正
臨洞門上洞門中列二柱界為一門兩窓延耀內射正
當圓柱予詫為異導者曰未也轉進橫峽口又西行四
五丈有竅南入甚隘悉去衣赤體伏地蛇行以進穴長
三丈大僅如筒又曲折中又懸柱時從游兩人以炬先
入次及予度稽一時過隘洞復穹然上崇下陷俯躬南
降垂乳紛列迴環左右迥與外別導者曰未也又西踰
一梁梁橫南北若闕越梁西下石乳愈奇西窮復轉北

上藻績滿眼彌轉彌勝此洞與山南黃鸝岩正南北相
當然一山皆空環峙分門者尚多也北向開洞門者三
此為中東西二門俱淺東向開洞門者五北為高穹中
為三曲狗頭南為道士東峽和合小岩而三曲最深南
向者三即平地道士黃鸝也志稱辰山有洞三級第指其
南耳惟西面予未之窮出青珠洞過北洞一東麓洞五
循南入平地岩初入歌仄側身緣東隙而上內境既穹
外光漸闕火炬已棄北隅暮色亦上乃出東北返王慶

字家

十四日別慶宇東北三里過矮山山在堯山西瀉水東北聳一枝如附拇指乃桂林石山最北首峰也山南崖削立下有白岩洞洞南向三竇旁通內垂石如蓮葉捲覆下多透漏其後少窪下輒復平曠轉西入數丈仍見南穴天光出洞東有菴于是東向溯小溪二里抵堯山西麓又二里為玉虛殿山迴成塢西向開洋由殿右轉入山後兩山夾澗南向溯澗半里踰澗東上登巔角益

東北上升降三四又二里始登堯山絕頂此中石峰森立間得此土山反以為異故堯山名特著山之東石峰叢合有溪盤遶其間當即大壩上流出廖家村西者也下山仍返西麓南度橋五里出堯山東南塢其南石峰森森東南一峰尤兀突益東南馳松篁間出林夾右轉石山而南即鐵峰山頗似獨秀下有岩洞不可入西南二里抵冷水塘小橋跨流急湧西南去一村依山逐澗亦幽棲之勝村南石峰如屏東西橫亘從西嘴望之薄

若豎指由其腋東轉南山之坳出山南大道直西馳共
三里過萬洞寺則石山四開寨山兀立其中望寨山東
崖穹然壁立而不睹其徑循山南抵西麓乃歷級北上
當寨山西北隅崖開一罅上架橫梁踰梁而入東貫山
腹已在嵌室內遂托宿

十五日曉起徧觀洞中其洞西北東南前後兩關中通
隘僅容一人由西麓上山腰透入飛石下旋躡其上卷
石為橋以達洞門門西北向門內洞界為兩南北並列

北洞後即通隘透腹處隘長三丈既入即寬闢為岩懸
乳垂蓮紛綸左右東岩上下俱極崇削下亦有深洞路
當山麓南轉始得東上既晨食西北望黃金岩甚近亟
趨之不復東尋下洞也下西麓過竹橋由村右西北行
三里抵岩之陽山骨立路北下裂為洞南北交透前卑
後峻後門之半石橫架空中門界為二由洞內上躋北
出駕梁之下俯視北麓拖劍水直嚙其下土人俱指此
為黃金岩南下出洞西復有洞南向高裂深入不透僅

如重峽已從西麓北轉山西北垂亦有洞西向中穹不甚深透對面有東向一洞與此相向若門廡洞內分四支如十字東北二門外透而明西南二峽內入而黑然西北皆懸崖上與東其所入南乃深潭也拖劍水在東峰北抵洞前轉北循山當洞有橋跨之橋內匯為池亦山叢水曲之與出洞不知其名問汲水池中者曰此洞不知名上更有一洞可尋躋也亟披箬透崖上南北兩石屏並立起微徑界其中甚峻洞峙南屏後門亦東向不

甚宏洞有舊鐫黃金岩三字可辨是洞始為黃金前乃其東峰之洞也出門左見北屏內峽有路上躋為夙莽而翳雨深蔓濕不堪置足予強登之南轉則上洞也門北向棘蔓交絡縷分之乃得入入則旁竇外通重樓三疊度閣之石版纔蟬翼薄然无級罅可扳惟中洞之內旁竇玲瓏懸隙宛轉可穿而上第甚隘層折難舒解衣蛇行遂出上層平度閣上踞洞口飛石高呼靜聞乃下迴望黃金岩西北麓諸洞尤多乃隨拖劍水遶出北麓

又得北向洞二西向洞三遂西趨屏風山將渡拖劍水
望屏風黃金兩山中又南界一山下有洞北向迂道從
之洞亦旁分兩門一北向一東向西有級上躋再上級
崩路削又有洞北向乃下抵西北隅則旁透中空之洞
峽連關與黃金西北同正西一洞穹巍層裂紛拏傑張
此又以雄武見奇非尋常窈窕窟也問之土人知為飛
石洞遂西渡石堰一里入程公岩北二里仍飯王慶宇
家西再探道士諸洞過屏山西麓至是已四周其山入

浮橋門浮橋共三十六舟云

十九日始定陽朔舟

二十一日日中乃行南過水月洞東又南雉山穿山關
雞劉仙崖頭諸山皆從陸遍游者惟關雞未到今舟出
其東麓崖頭有石門淨瓶勝舟陽洲以行不能近悉去
省已十里崖頭之南江流浩然自放又東南二十里過
龍門塘南岸有山嵯峨中峰最高處南北透東五里橫
山岩突立江右又東南十里江右削崖屏立南五里至

碧崖岩岩南石峰隔江排列橫障南天上分危岫幾埒
巫峰五老扼江使東江流噬其北麓怒濤翻壁赤壁采
石失厥雄麗崖間一石紋黑縷白章成泛海大士曰沉
香堂其處南雖崇深極致北岸猶夷豁共五里下寸金
灘南轉入山峽江自是左右皆石峰巔坼爭奇炫詭入
峽下斗米灘五里為南田站當桂陽朔界山遂轉峽為
塢四面層圍僅受北村過南田山色暮合舟人夜棹不
休江為山所泥侂東侂西盤峽透崖凡二十五里抵畫

山月未起山隱空濛中又南五里為興平月從羣峰東
隙出舟泊候曙漓江自桂林南來兩崖森壁迴峰中多
洲渚分合无翻流之石直瀉之湍故舟行屈曲石穴間
无妨夜棹第月起稽時暗行明止未免悵悵

二十二日早起月光破曉竒峰合棹南三里為螺蛳岩
一峰盤旋上轉峙江右興平水口山也又七里東南出水
綠村山乃歛峰掩蓬就寐南三十里則龍頭山復錚錚
骨立而陽朔四圍直碧蓮玉笋攢成矣陽朔北自龍頭

南抵鑑山二峰魏峙當漓江上下流中有掌平地乃東面瀕江以岸為城而南北屬於兩山惟西面疊垣為雉城西山最近者為來仙洞石人牛洞龍洞諸山通省大道從之蓋陸從西水從東也其東南門鑑山下則南趨平樂水陸並道正南門亦西北轉通省道直南為南斗山延壽殿旁建文昌閣无徑他達正北即陽朔山層峰駢峙東接龍頭東西城俱屬於南隅北則以山為障无城亦无門東北一門在北極宮下僅東通江水北抵儀安

祠讀書岩然俱草塞罕人行雖東臨瀉江開三門以取水上午抵城入正東門從文廟西入縣治蕪寂殊甚縣南半里有市橋橋下水西自龍洞入城出橋東即懸流注深壑壑大四五丈四面叢石盤突為龍潭但飛流下搗不見下流所溢潭東即城大江流城外蓋地穴潛通也橋南鑑山獨聳一名易山即南借以為城者東麓有鑑山寺倚山臨江通道置門即東南門也西麓則正南門余初抵北麓覓道上躋南東二面就崖為城惟北面

在城內有微級久為莽棘翳沒乃扳條捫隙直造峭壁
下莽徑并絕復出其旁躡巉石盤旋半空終迷所向乃
下時顧僕守舟期東南門外於是南經鑑山寺出東南
門覓舟不得渡江東一里至白沙灣舟泊其南乃下舟
白沙灣去城東南可二里民居盛於城有河泊所其南
三峰列峙最東一峰曰白鶴山江南抵其脚曲而東北
抱此一灣沙土雪潔其東南一溪南自二龍橋來北入
江溪在南三峰之東逼白鶴西址出溪東又有數峰自

南趨北界溪入江口最北者書童山也江以此乃東北
逆轉

二十三日從白沙依江東北行一里南渡江已出東界
山之東江東北岸有高峰矗四尖起障江南趨既渡陂
塘高下林木脩然有澄心寺可憩東一里過穆山村復
渡江而東循四尖南麓趨出其東山開日曠奇致愈出
前望東北又起一峰上分二歧東歧若僧帽垂空西歧
尤高聳四尖東枝銳若脫穎與二歧西岫建標絕頂各

見雄振迴眺西南隔江下皆尖崖並削上懸雙岫此即
書童之南東界羣峰所幻出隨江東五里出二歧東南
踰嶺下為佛力司當江南轉處北去縣十里問之居人
始知二歧西峰最高者狀元峰乃仍踰前嶺北去西一
里抵紅旗峒竟峒西北一里抵山下北上斷磴間三里
踰山坳乃東西峰分歧處西北度亂石重蔓直抵高峰
崖畔有洞東向門高穹上懸竅兩重簷覆出无由得上
洞前東向之峰即似僧帽者其峰亦有一洞西與北山

對懸壑隔莽竟不得達予必欲一登峰頂南北俱壁立
絕磴從洞南緣峭梯險轉從峭壁南直抵崖半則穹然
无片隙不復手足力所及遂下飯佛力肆居人蘇姓者
謂此峰懸削曾无登路數年前峰側有古木一株其僕
禱而登絙級備窮峻阨然止達木所亦未造巔後遂問津
者絕輟乃返白沙灣佛力司之南山益開拓內雖石峰
離立外俱排山亘嶺桂林秀出雲峰南盡於此聞平樂
以下四顧皆土山巉厲之石不挺於陸而藏於水山自

此而頑水自此而險也

二十四日由白沙截江渡南峰下循麓東南又轉一峰
有岩高張東向為田家洞即在白鶴山下軒朗平豁上
繁垂乳白鶴東對書童山排闥而南內成長塢塢中舟
行六十里可抵二龍橋出白鶴循北麓溯江三里入東
南門肩炬由正南門出西北循大道向龍洞岩二里東
越小橋有兩洞西向其南列者為龍躍岩地稍下門極
危朗北洞地稍高草塞門徑先入南洞東五丈層陟一

臺臺右有竅深入出由洞北登龍洞岩藝炬入洞濶丈
五高一丈南崖半壁平亘如行廊入數丈洞乃南闢頂
始高後壁下方圓池各一深五六寸泉澄明如鏡屢斟
輒滿池上蓮疊小龕俱無通道處由左壁窪陷處伏地
入漸入漸小穴僅巨管大蛇行南透五六丈始可屈伸
已而遇旁裂龕得宛轉達躍龍後腋出洞東望龍洞南
列峰閭闔重啓異之遂渡溪東行棘莽沮洳中共一里
抵山下初入西向第一門高穹如峽東入數丈北轉愈

昏杳莫窮乃南轉得明穴西透西出洞門之上蓋南上
西向第二門也由其外更南上西向第三門洞東入成
峽如初洞峽底迫仄峽上層疊有同閣殿入五丈下峽
既盡上懸重門圓整擬剜琢第峽壁峭削難階與靜聞
索慮躋躡得上峽一層而最上層即懸亘莫能達出洞
前仰望洞頂又連啓兩門此又南上西向第四門第五門
也異其中下通峽內重門于是又過南上西向第六門
仰睇懸崖倍高削彌難扳即又過南上西向第七門見

石紋層異出者可置足竅入者可鉤指遂反躬上躡
凌數十級抵洞門洞北又夾坳豎起高五六丈始入上層
其夾光膩无級計絕所扳予審視周夾雖无級罅而夾
壁宛轉可以手撐足支不慮懸墜遂聳身從之如穿
井皆橫綳縱發不階級磴也既升夾脊其北復隕然成
峽穿映明透知與前所望洞必有一通因騎牆坐上睇洞頂
四達高呼促靜聞久之至教之如前法登同從脊北下
峽中峽底平曲折北進西上高懸一門則第六門也不及

上循峽更進轉西出第五門門有石龍下垂三四丈由
龍側北循崖端得第四門穿門東入稍下次層中廓然
四闢右向東轉深黑无窮左向西出即前第三門上層
也如重門若剜琢處當在其內循崖窮之復隔一柱轉
柱隙入門內另環一函不遠亦不透也自第三門上連
關四門初俱扳躋无路一入第七門宛轉俱達升陟重
樓複閣間有莫公臣者徧題珠明洞云仍從第六門峽
內西向扳崖上門雖高張内外都无餘地不若四五二

門外懸臺榭內疊樓楹也乃逾脊南下第七門門外循崖復南又得南下西向第八門洞亦成峽東上雖高峙鮮所旁徹此山西向八洞惟南北二洞不交引中夾四洞最高紛紜曲暢較他處一二洞勾連輒擅奇稱真霄壤矣下山循麓南半里路東西各一峰屏峙遂由南門抵市橋入龍潭菴莫姓者隨予至問游岩樂乎予艷稱珠明曰牛洞也數洞相連然不若李相公岩尤勝即在西門外不可失仰視日色尚高亟出西門攜火炬從岐

北行復西岐已繞此山東北兩面蓋即前屏峙路旁東
峰也繞至西麓洞正西向西峰門右鐫閩人李杜記題
為來仙洞入洞東行不甚高夾南轉遂昏黑秉炬東南
入乳竇初隘漸進愈宏放瓊葩雲葉繽紛上下東北轉
成穹峽高不見頂其垂突蹲裂種種開勝益深峽忽下
墜淵昧不可以丈計炬火星散投之沈沈杳不得其底
其左削崖不能受趾右乳柱紛綸窓戶歷歷隔崖探以
炬內若行廊玲瓏似可遠達松光將盡乃由舊道出東

入西門出東南門渡口桂林舟人已艤舟待遂入舟宿
二十五日舟過水綠村北七里西岸一岩門甚高敞東
向臨江前垂石成龍曰蛟頭岩由岩右峽深入漸高黑
由岩左登前亘為臺後結一竇竇後深陷成峽以元炬
返時舟已先移待興平出洞循麓溯江半里達螺蛳峰
下繞峰東麓又二里及舟北過興平二里泊

二十六日北五里抵畫山山橫列江南岸江自北來至
是西折山受嚙半剖為削崖石質錯綺成章舟人泊山

脚晨食予乃登其麓與靜聞選石踞勝崖半洞北向望
之甚深高下都无著足處返而登舟北上小散大散灘
至鐸鼓灘共十里其山南岩竅有水中出緣突石飛下
墜江勢同懸瀑粵中皆石峰拔起水隨四注无待破壑
騰空此瀑出崇竅尤奇絕又北八里過蘭州西北岸一
峰純透初望之疑即龍門穿穴以道里計之始知另穿
一峰前以夜棹失之耳又北三里為冠岩先是江東岸
斬崖丹碧煥映采艷畫山冠岩即在其北山上巽崖層

出麓穹一洞西向臨江水自中出外與江通棹舟入洞
門甚高內更宏朗悉懸乳柱惜流通之竇下伏无從遠
溯久之棹舟出洞望隔江羣峰攢合憶前蘭州所見穿
山當正對其面惜溪迴山轉并其峰亦莫能辨識頃之
忽北見皎然一穴另懸江東峰半即近在半岩北亟登
岸趨之期舟候南田站一里抵山腋踰嶺度明月在東
南面絕崖不可扳反循崖北稍下則洞果南透其上甚
薄上穹如合掌中罅北下俱巨石磊落南則削崖懸亘

故登洞道必由北洞東皆旁門複室東北彌深仍轉洞
西北隅又得一洞南北橫貫北峰之麓透而不敞仍南
出西北行平疇中其西隅江屏立者皆穹崖削壁陸路
望之更覺崢嶸東則石峰離立後托崇巒共四里至南
田入舟

二十七日經橫山碧崖諸勝天間昔游橫山岩東向右
腋有竇旁穿而南南復闢一洞甚宏有門有奧奧西上
則深入昏冥奧之南墜皆嵌空透漏門在墜奧東廓然

凭流與前門比肩立又西北過龍門塘南望橫山岩西
透頂峰雖似穿石无從上躋夜過新江口十里泊

二十八日昧爽亟推蓬已過崖頭山十里抵水月洞北
城下入浮橋門

二十九日入靖藩城訂獨秀期主僧辭甚遼遠予初擬
再至省一登獨秀即往柳州至此失望悵快

三十日炎威莫支倦卧寓所

六月初一日訛傳流寇薄衡永藩城愈戒嚴予遂无意

登獨秀獨秀山北面臨池西南二麓予俱已遶其下西
岩亦曾再探惟東麓與絕頂未登其異於他峰者祇亭
閣耳

初二日同靜聞再為七星樓霞游由七星觀左入即登
級為碧虛閣閣在摘星亭左昔游急於七星以為此軒
閣无煩屐齒後累經其下上見岩石倒出異之至是遂
先入仰望閣上為瓦所掩不見岩頂轉入玄武座後豁
然透空高跨頂上如梁類穿山月岩惜人坐閣內不見

出閣後石垣外始見亂峰飛石森列掩映詢閣僧後山
道何向曰須南自大岩庵乃出仍登摘星亭入七星前
洞由閣後東上數十級得小坪石盤其中遂北轉透重
門出門東壁外崖裂竅懸雲解衣上連躋重龕二層俱
列戶梳楞勢同垂握北下即棲霞洞盤空西向矣此山
岩洞駢峙棲霞在北下透山之東西七星在中曲透西
北出碧虛閣在南亦東西上透三穴並懸六門各異北
又有朝雲高峙兩岩皆西向北七星山西面之洞也洞

凡五下棲霞南入大岩菴望碧虛岩後山石叢薄可由
菴外東北登遂從菴右草坪中上共一里得坪一區小
石峰環拱之秀薄層雲西即碧虛岩透明穴北即七星
山頂與餘峰攢成斗列者覓小徑出東南坳中下山共
一里得一岩東南向西下即曾公岩也曾公西又有洞
在峰半扳莽上洞口亦東南向初由石峽入得平展處
稍北轉外復有龕東列後則穿門西入內益崇空深轉
杳不可睹下山出花橋東街此處岩洞駢峙者亦三曾

公岩北下同列者又有二岩予昔游省春經此俱東南
向此七星山東南之洞也洞凡五若北麓省春三岩會
仙一洞旁又淺洞一俱於前日屐經者則七星北面之
洞也洞凡五一山凡得十五洞云返寓於肆中得桂林
故勝西事洱百粵風土記諸書按部考勝者竟兩日

初五日讀清秀岩記即出西清門覓之門在西北隅城
外削崖之半有洞西向出渡城濠壩西有二歧一循山
北行即北門西來大道皆石峰突峙其北片片若削下

開大洞西南向曰橫洞一從山南入峽疑即清秀道遂
南西行一里峽南北山俱中斷開徑四交徑西北有洞
南向覓道北入愈入愈深旁絕他竇峽危底平灣環以
進莫測幽際出問行者曰黑洞也問清秀何在曰正西
有山屏立峽中者下有牛角洞由北徑出峽有塘曰清
塘西南瀕塘為下庄洞无所謂清秀者予意清塘當去
清秀不遠遂北轉從大道出峽峽門東西崖俱有小洞
无徑可登北出臨塘瀦水一泓浸山西北麓循之西路

南嵌崖末北俯淵碧忽歧南上扳躋漸高沒磴仰望都
无懸竅知非洞所在乃下出塘之西其南山迴塢轉別
成一壑門殊杳然仍返過黑洞西向屏立峽中山一里
抵屏東北即有洞斜竄門東北向南下漸窅昧為牛角
洞出洞遶屏北而西轉出南麓屏南崖峭削色黃赭下
有窪瀦水從山麓石崖出崖不甚高中若崆峒即牛角
洞南通穴至此墜成水窪也又東抵南峽門北入問清
秀於途人其人曰惟北峽有清塘上有洞南與黑洞通

此外无他洞乃悟清秀所托不必出北峽時已當午舍
之南炊隱山西過西湖橋一里抵小石峰下峰片峭裂
中介衆峰間南瀕陽江東北西三面俱短垣環之從西
北隙踰垣披其東北抵小峰南麓峰雖小如蓮之間辦
列房半崖坪中有石高丈許如犀一角獨聳後又盤空
上片攢支削尤增奇幻搜剔久之出問其名曰秋兒庄
西即陽江西來有疊堰可渡南即趙家山穆陵村中隱
諸洞云循陽江北岸西一里為獅子岩西又聳一峰與

獅岩夾有岩東向凭峭石之上中垂一柱旁楞裂正東
瞰獅岩首北轉又一洞北向崇穹曰天慶岩由級南中
亘壁界洞為兩入數丈兩峽復合其北峽之上重門複
竅懸綴甚高望不可扳登此可直通山南北出洞西北
行石山叢薄間山俱林立圓聳從松陰石影中又北里
許經石山西麓兩洞比肩西向捫棘入南洞進五六丈
轉從北洞出仰望洞上飛崖片片欲舞為蝦芭山西有
林木迴叢平疇陽江西環之王太守園也仍從雙洞南

東北而登得石磴一里踰坳西扳石鐐上所扳石銘若
劍戟石斷崖絕棘刺叢聚遂出舞空石上瞰北麓斗懸
難下尋舊磴下西麓繞出其北東一里至宋家庄出牛
角洞南北過北峽間北眺西峽半有洞岬然當即清秀
暮色已迫趨入西清門

初十日始出振武門取柳州道西五里過茶菴菴南小
徑二里至琴潭岩岩東有村土人訛為陳搏予得桂勝
方信儒記云得清秀玉乳琴潭荔枝四岩故首覓清秀

幾及復失以下三洞无知者予疑陳搏即琴潭今抵其
村覓一人為導聞東南有七寶岩先趨之乃東南渡南
溪上流共三里至李家村村南石峰西向巉突若不深
而峭蓋在南溪白龍洞正西向游白龍時西望羣山迴
曲處也返陳搏村導者負松明并梯至西趨小山南先
觀水洞門南向水匯其內浸洞口洞中衍四旁皆水所
際其左深入洞前左崖瀕水趾刻琴潭二大字即信儒
筆洞左復開一門後與洞通中多列柱垂葩嵌空虛度

予既得琴潭知荔枝當不遠導者篝火執炬請游幽洞
徵幽洞何名果荔枝岩也出琴潭沿山左瀦塘行遠塘
北轉而西至荔枝岩門東向不甚高西進數丈循洞底
右竅入其下穴有方池四旁甚峻再東南轉平入數十
丈兩度低隘右崖半一竅高濶僅盈尺內洞平穹瀦水
齊竅引首竅中東望其水廣邃中石龍蜿蜒右崖南崖石
盆一方平度水面不能深入也仍出至洞底少西進循
右一竅入上峽東有石幢圓立繞出其後忽度為兩層

下穴少西轉輒止上穴以梯上躋內復列柱分楞穿楞
少西遂下南峽中平入數十丈又南旋為龕龕外洞頂
亦復龍形天矯仍出洞底又循北竅入上峽則層壁紛
垂懸蓮徹柱雜然凝綴大抵此洞以幽閼見奇而深入
在右小竅側小石彈丸大多磊落痕稱荔以此出洞西
北三里抵大道平塘街其西石峰峭甚夾立如門南峰
山頂開穴達山腹予向尋錢岩過此神動今急問道知
道旁油坊後轉東南至古廟可登乃曳杖過坊南无徑

可入逡巡得蛇道伏草間隨山麓東行南轉將抵古廟
見有路西上從之始捫級既乃梯崖崖窮陟峽棘蔓擁
沒髻頂鈎不能出久之抵叢石崖下其上分形設詭計
透明之穴已與比肩乃橫陟而北逾轉逾出峰頭俯瞰
嵌崖削窟反在其下下有高呼路悞指予下踐之級者
隨其指下呼者為二牧翁云登崖道尚在古廟南遂從
廟南歷級上西南轉出山坳間眺其南一峰枝起頂豎
一石高數丈予所見石峰綴立雁宕翔鸞龜峰靈芝及

此地笋石駢發未有靈怪至此者度已出崖後遙瞻石壁下猶未見洞門日暮返宿平塘期明日導游

十一日從古廟南登山導者斬棘以先共一里抵昨返步處石隙中登數步望見洞門西南向又扳石崖數步即入洞其門前向東北後向西南徹望通明後洞正對暨石峰導者謂洞曰榜岩山曰楓木云下山過古廟南由田塍中渡西來小澗水自兩路口西塘迤邐東穿山麓即南溪發源也東南入石岩洞門西北向後門東北

向中空洞旁裂後門右崖有臺架虛上又盤蓋隆起衆竇
楞隱透出後洞北一里仍抵平塘街街北石峰巒岼若
屏東隅有崖東向曰杜岩街西北尋銅錢岩即前所游
架鼓岩也西二里經兩山峽峽北山巍然負扆下為廣
福王廟峽南山東有岩門東向西出峽為西路口市肆
盛列西北為義寧道予往柳州則從西南永福道路東
有岩西向門甚紛紜多所像類西四里路右小峰如佛
掌高擎下合上岐於衆峰中尤異其南又駢峙兩山東

成峽峽南之山東層裂兩岩上岩明透山後急南趨之
祇下岩可入上岩懸疊莫登乃入下岩岩中列柱牽帷
為峽為窓轉透其後亦橫貫山腹予意由後竅西出可
反躋上岩透處乃上下俱削旁絕階援仍東出洞前東
北隅石頗坎坷披隙登上層則前後二門俱與下岩並
列門內乳惟蓮柱左右環轉以達後門數丈之內紆折
无竟前門一臺正對東北合掌峰凭後門龕牖遙矚西
南塢外之奇收攬都盡予所見粵中重樓之勝此為第

一既下西向行又見重樓北麓復有岩北向此峽南之
山也在峽北者西向亦有二洞層列洞門俱石色赭黃
獨為標異但一出峽匯水直浸兩峽西中疊石堤亘水
面旁皆巨浸无從渡水一登赭岩又聞有八字岩亦不
能至由石道西行匯水中望西峰之東崖壁高亘上懸三
洞相去各二十丈俱東向駢列其在匯水西南與東峽
南峰東西夾塘成匯遥睇崖端俱有微痕自南之北可
上躋惟北洞嶄然懸絕不可階升遂循堤西草徑傍水

而南已抵南洞下梯崖入洞門甚崇內崆峒宏峻規模
迥別稍下一歧由右入西南轉漸窄昧莫規底止一歧
由左入不五丈則一門西透山後一門北通中先西披
後岩洞門高與東埒上下俱懸崖斗巘遙望西對南山
亦有洞若覆梁門廣中邃曰牛洞東向黯黑而不知其
涯仍入內北上中洞洞亦北轉而東透探其北轉至洞
門有石內度架為兩層上疊閣倒向洞內下裂門嵌壁
門即所望北洞也仍入中洞內東臨洞門門愈高穹下

則崖危路絕遂循南洞出由舊級下一里北出大道西
循南山北麓行三里越一平坡其南北岩洞甚多不暇詳
步南至通城墟又南一里為上岩後洞門北向前臨深
塘入其內擴然崇宏峽分左右進右峽下墜為淵石壁
東西夾峻不可下其底南眺沈沈壁西之崖迴覆淵上
予所駐足下眺者壁東則絕壁之下駢通二穴若環橋
連亘水通其中不知所往北則石壁自洞頂下挿淵底壁
半裂柱成隙泉淙淙下注出右峽由左峽上入則蹲石

當門中聳為臺臺上一柱支洞頂路從柱南北入內有石崖自洞北南突若塞門與洞南夾壁成罅路循崖南西出繞崖後外穹為門門下橫闕而上多垂簷踞闕坐門外峽復峭峙兩旁多倒懸下攬之石若龍爪猿臂紛拏其門俯仰兩絕出洞循其東麓復開東向門內窪下滴水空聲轉南漸黑當即通後洞環橋水穴者洞南則上岩村村後疊石開徑曲折上為上岩前洞門東向高齊後洞肩深折不及洞側有臺趾由臺直躋洞後迸竇

成龕垂石如距有垂至地下離一線者有中懸四旁忽
卷者有柱立輪囷其中者有爪攫分出其歧者其東南
對山有泉源曰龍泉云下洞仍出後洞塘北西向入東
來大道度高橋共十五里至山蚤鋪四旁雖土阜間出
石峰尤岿突焉又三十里抵蘇橋為洛青江上流水始
捨桂入柳去予遂與桂山別

徐霞客遊記卷三上